

مقال

أمهات في تاريخ المسيحية

✍ خدام مدرسة مار إفرام السرياني

مقال عن أمهات في تاريخ الكتاب المقدس و المسيحية ... و قد إيه دور الأم عظيم



💡 المصادر:

[مقال: أمهات من الكتاب المقدس.](#)[مقال: أمهات قديسات في تاريخ المسيحية](#)

دور الأم في الأسرة مهم جداً ... و عليها يقع الدور الأساسي في التربية ... و الكنيسة أحد أهم ألقابها إنها أمنا تعالوا نشوف من تاريخ الكتاب المقدس و المسيحية مثال للأمهات كتبن التاريخ و كن قديسات عظيمات (طبعاً أولهم أمنا العذرا اللي لازم تيجي في بالننا لأنها أمنا كلنا) ... و أمهات برضه أثروا في التاريخ لكن الناحية الثانية

في العهد القديم

- حواء: أم كل حي ... أول أم في التاريخ ... اللي خرج منها هابيل البار ... لكن برضه خرج منها قايين القاتل
- امرأة نوح: امرأة نوح واضح إنها كانت زوجة مطيعة ... كأم: خرج منها سام و يافث اللي احترموها أبوهم ... لكن خرج منها برضه حام اللي أخذ اللعنة
- سارة: أمنا سارة شهد لها الكتاب إنها من (النساء القديسات المتوكلات على الله) ... و جابت إسحق ابن الموعد بإيمان (زي ما بنشوف في عبرانيين 11) ... لكن يُحسب عليها إنه لما اتأخر مجيء إسحق، أشارت على إبراهيم إنه يتجوز هاجر، و دي مكانتش خطة ربنا
- **امرأة لوط:** مثال سيء للأم ... اللي قلبها لسة في العالم و الأشياء التي في العالم ... اللي ماقدرتش تربي بناتها كويس و تفصلهم عن السلوكيات الوحشة اللي في المجتمع اللي حواليتهم ... و دي برضه ذكرها السيد المسيح لما

كان بيتكلم إننا مانبضّش للعالم ولا يبقى نفسنا فيه: "أذكروا امرأة لوط!"

- رفقة: أمنا رفقة اللي عزّت أبونا إسحق بعد موت سارة ... وقعت في غلطة كبيرة في التربية هي "التمييز" ... ميّزت في المحبة يعقوب عن عيسو ... و كانت النتيجة إن عيسو بعد خالص عن خطة ربنا, بينما يعقوب خدع أبيه عشان ياخذ البكورية
- راحيل: المحبوبة ... اللي يعقوب اشتغل 14 سنة عشان يتجوّزها ... ولدت يوسف الرجل العظيم ... لكن للأسف برضه لما يوسف اتأخر عملت زي أمنا سارة, قالت ليعقوب اتجوّز جاريّتي ... و نتيجة لكده جه دان
- **يوكابد:** أم موسى ... مثال رائع للأم!! مخافتش من أمر فرعون و حاولت تحافظ على حياة ابنها ... و ربّت مريم بنتها على تحقّل المسؤولية, لدرجة إنها كلّمت بنت فرعون لإن يوكابد تكون مرضعة لموسى ... و واضح جداً إن يوكابد ربّت موسى تربية تقيّة لدرجة إن موسى (زي ما بيشهد له العهد الجديد: "بالإيمان موسى لما كبر أبى ان يدعى ابن ابنة فرعون مفضلاً بالأحرى أن يُذل مع شعب الله على أن يكون له تمتع وقتي بالخطية") ... و يوكابد ولادها هم: مريم النبية - هارون الكاهن رئيس كهنة العهد القديم - موسى النبي أعظم أنبياء العهد القديم
- أم شمشون: كانت ست تقيّة لكنها عاقر لم تلد ... لما جه ملاك الرب يبشّر بميلاد شمشون و يوصي عليه كنذير, جه الأول للأم لوحدها قبل ما يظهر تاني لها و لزوجها منوح ... ربّت شمشون تربية كويسة ... و حاولت كثير تنصحه و تحذّره من شهوته لكنه ماسمعش الكلام ... لحد ما وقع تحت إيد الأعداء لكنه تاب في الآخر
- **راحاب:** اللي حياتها اتغيّرت 180 درجة ... مش بس دخلت شعب ربنا, دي كمان اتجوّزت سلمون (ابن نحشون, كبير سبط يهوذا في الوقت ده) و ابنها هو بوعز العظيم ... يعني بقت جدة السيد المسيح
- **نعمى:** أم عظيمة تانية ... رغم إنها راحت أرض أُممية و سابت أورشليم وقت الجوع مع جوزها و ولادها ... إلا إنها اهتمت جداً في اختيار زوجات أولادها ... كانت مؤثرة جداً فيهم لدرجة إن بعد ما ولادها ماتوا و قرّرت ترجع أورثليم, أصرت راعوث إنها ترجع معاها و تسيب شعبها و آلهتها
- **راعوث:** أُممية تانية أصبحت من جدّات المسيح ... إخلاصها و عفتها خلّوا حتى بوعز العظيم يختارها زوجة ليه ... و أصبحت من جدّات داود النبي
- **حنة:** أم صموئيل أعظم القضاة ... اللي كانت عاقر لكن تقيّة و مداومة على الصلاة إن ربنا يرزقها بابن و هي تكّرّسه لربنا طول حياته ... و فعلاً حصل كده و صلّت حنة صلاة و تسبحة رائعة بنقراها في سبت النور (صموئيل الأول 2) ... و جابت نبي و قاضي عظيم في وقت كانت كلمة ربنا عزيزة جداً
- بشبع: إمراة أوريا الحثي اللي أخطأ معاها داود و بعدين اتجوّزها ... من الشخصيات المحيّرة ... جه من نسلها السيد المسيح برضه (لأنها كانت أم سليمان) ... و سليمان الحكيم اللي كتب الجامعة و الأمثال و النشيد و الحكمة ... لكن طبعاً سليمان كان معروف إنه "مهما اشتتهه عيناه لم يمسكه عنهما" ... لكن الأكيد إنه كان بيحترم أمه جداً لدرجة إنه قام للقائها و سجد لها (ملوك الأول 2 : 19) ... و كان لها دالة عظيمة عنده لدرجة إن أدونيّا استنجد بها عشان تستعطف سليمان عليه
- **المرأة الشونمية:** سيدة عظيمة, استضافت رجل الله إيلشع و أكرّمته مرات كثيرة ... ولم تطلب منه شيء رغم أنها كانت عاقر, لدرجة إن جيحزي هو اللي نبّه إيلشع إنها ماعندهاش ولاد ... و فعلاً جه الولد ... لكنه و هو صبي, أصابته

حقى في يوم ... و مات ... لكن هذه الأم العظيمة تصرّفت بمنتهى الإيمان، أدخلت ابنها عليّة إيشع و أرسلت له، و لما قلق قالت له: سلام (يعني مافيش حاجة) ... و لما جه إيشع صلت بإيمان و قالت له ... و فعلاً أقام إيشع ابنها

- **أم طوبيا:** في سفر طوبيا، الإصحاح الخامس نسمع عن هذه الأم المؤمنة ... اللي لما كانت الحالة المادية صعبة، خافت ابنها يسافر و قالت مش مهم نعيش عيشة صعبة، المهم ابني يكون في أمان ... و لما طمّنها طوبيت و قال لها ربنا هيحافظ عليه، آمنت، و فضلت منتظرة عودته بإيمان "وأما حنة فكانت كل يوم تجلس عند الطريق على رأس الجبل حيث كانت تستطيع أن تنظر على بُعد"

في العهد الجديد

- **العدرا:** طبعاً أعظم أم في التاريخ ... أم الله، أم النور ... مهما اتكلّمنا عن العدرا مستحيل نوفيها حقها
- **أليصابات:** أم يوحنا المعمدان أعظم مواليد النساء ... نقرأ عنها أكثر [هنا](#)
- **أم يعقوب و يوحنا:** أم ابني زبدي ... اللي كان نفسها تشوف ولادها واحد عن يمين السيد المسيح و واحد عن شماله ... و ولادها ال 2 كانوا أقرب تلاميذ لربنا يسوع (مع بطرس) ... و بقى واحد فيهم أول من استشهد من الرسل ... و الثاني يوحنا الحبيب آخر من بقى حياً من الرسل
- **أم مرقس:** ابنها بقى رسول عظيم ... و بيتها أول كنيسة في العهد الجديد، اللي أقامت فيها أمنا العدرا و الرسل، و حل فيها الروح القدس
- **المرأة الكنعانية:** أم إيمانها عظيم ... بمنتهى الاتضاع احتملت كل الكلام و طلبت من السيد المسيح بإيمان و إصرار أن يشفي ابنها ... فنالت شفاء ابنها و تطويب السيد المسيح لإيمانها
- **أفنيكي:** أم تيموثاوس الرسول ... اللي شهد لها القديس بولس: "إذ أتذكر الإيمان العديم الرياء الذي فيك، الذي سكن أولاً في جدتك لوثيس وأمك أفنيكي"

في تاريخ الكنيسة

- **القديسة مونيكا:** أم القديس أوغسطينوس، اللي تاب بسبب دموعها عليه
- **الشهيدة رفقة:** اللي شجّعت ولادها ال 5 على الاستشهاد و استشهدت هي كمان
- **الأم دولابي:** اللي شجّعت ولادها الصغار في السجن على الحفاظ على الإيمان (في عهد دقلديانوس) ... و استشهد ولادها على ركبتيها في عهد أريانوس واحد ورا الثاني و أخيراً هي
- **الشهيدة يوليطة:** اللي كانت بتتضرب قدام ابنها الرضيع، و كان أهم صلواتها ليه إن ربنا يعطيه إكليل الشهادة و مايبعدش عن الإيمان ... أم الشهيد الصغير كريكوس اللي ربنا استجاب لصلاتها و خلّى كريكوس يضرب الملك لمّا حاول يخادعه و يخليه يترك الإيمان
- **القديسة صوفية:** أم ال 3 بنات (بستيس و هلبيس و أغابي): يعني إيمان و رجاء و محبة ... شجّعت بناتها ال 3 الصغيرين على الاستشهاد رغم إنهم عذبوا البنات و قتلوهم قدامها

و كتييير جداً غيرهم ... زي الأم اللي سال دمها عشان تعمّد ابنها لما كانت المركب هاتغرق بيها و ربنا حسبها له معمودية

في الختام ... تقريباً وراء كل قديس عظيم, أم عظيمة ... ما أعظم الأم اللي قلبها متّكل على الله و مهتم بخلاص بيتها